

ანა-გოგოს წერილი

საყვარელო თოვლის პაპა,
ჩემს ნატვრასაც გეტყვი, აბა.
საახალწლოდ მომიტანე
ფუშფუშებიანი კაბა!

ზედ ეხატოს
მზე და მთვარე.
ვარსკვლავებიც
ჰქონდეს, ბარემ!

რომ ჩამოჰკრავს თორმეტჯერ,
საახალწლოდ საათი,
შენც მოქროლდი მარხილით!
არ იარო ტაატით!

ვერცხლის ზანზალაკები
მალე მომიწკარუნე!
დაგახვედრებ გოზინაყს,
პირი ჩაიტკბარუნე.

გელოდები,
იცი, როგორ?

აბა, გკოცნი.

ანა-გოგო.

თამარ ფხაკაძე

გოზინაყი

საახალწლოდ ციყვს ბაზარში

უყიდია თხილი,

დათვმა თაფლი მოიტანა

ორი დიდი ქილით,

გააკეთეს გოზინაყი

და მიირთვეს დილით.

მაია კარსელი

ახალი წელი

ინათა, ახალი წელიც

გამოჩნდა თავისი აღმითა;

სუყველას ჩამოუარა

კარისკარ, ტკბილის საღმითა.

ბაღღებს შესძახა: - მოვედი,

ადექით, ძილი კმარაო,

მას წელს დავატკობ, ვინც შარშან

ამ დროს ვერ გაიხარაო.

თან მოვიტანე თქვენთვისა
სიმკვირცხლე, სიხარულიო,
ხალისი სწავლა-ცოდნისა
და ერის სიყვარულიო:

თაფლი, ჩურჩხელა, ჩამიჩი,
ბასილა, თაფლის კვერიო,
ვაშლი და თხილი მრავალი,
უხვად სხვაც ყველაფერიო;

ბურთი, ბზრიალა, ჩიკორი,
სხვადასხვა გასართობიო,
წიგნები ნაირ-ნაირი,
ერთი მეორის მჯობიო.

ადე, ჩაჰკიდეთ ხელი ხელს,
იხტუნეთ, იცქრიალეთო,
სხვა წლისთვის შესაგებებლად
ჩემი დღეები თვალეთო!

[შიო მღვიმელი](#)

ახალი წელი

თქვენსკენ მოვეშურები,
აბა, ჰერი, მარხილო!
მოვალ წელი ახალი

საამო და სალხინო.

თეთრზე თეთრი ფიფქები

მომყვებიან მტრედებად,

სიუხვე და ბარაქა

სახლში დაგებდებათ.

აბა, ნუ შეგაშინებთ,

თოვლის კორიანტელი,

მომაქვს ქვეყნის სიკეთე

და მშვიდობის ნათელი!

[ცირა ქიტაშვილი](#)

ახალი წელი

ახალი წლის ღამეს

საოცრება ხდება,

ძველ წელიწადს კიდევ

წელი ემატება.

ახალი წლის მოსვლას

ყველა ელოდება,

ნაძვის ხის ქვეშ პატარებს

საჩუქრები ხვდებათ.

[ინგა ქორდელი](#)

ახალი წელი

ახალი წლის ღამეა,
ცვივა თოვლის ფანტელი,
ქარმა დაატრიალა
თეთრი კორიანტელი.

ნეტავ რას აკვირდება
ცისფერთვალა ხატია?
ყინვას თურმე სარკმელი
კოხტად მოუხატია.

ნამვის ხესთან ბავშვები
ცეკვავენ და მღერიან.
თითქოს ჭერიც იცინის,
ყველა ბედნიერია.

ზარის ხმაზე კარს აღებს
პაწაწინა ცაბუა
და ოთახში შემოდის
თოვლის თეთრი ბაბუა.

ის გზად არ შეუშინდა
ქარს და ყინვის მარწუხებს.
ახლა ხურჯინს გახსნის და
დაარიგებს საჩუქრებს.

ლუარა ჭანტურია

ახალი წელი ტყეში

ახალი წლის ღამეა,
ციმციმებენ სანთლები,
მგელთან სტუმრად მიდიან,
ჟირაფი და დათვები.

მგელმა თავი გამოყო,
მომივიდნენ სტუმრები,
კორდზე დავლურს უვლიან,
მაჩვები და ტურები.

ციყვი გირჩის ახრამუნებს,
ნაზუქს აცხობს მელია,
ტურა შვილებს უმღერის,
ოდელია, დელია.

მხიარულობს მთელი ტყე,
ცეკვავენ და მღერიან,
ულოცავენ ერთმანეთს,
ყველა ბედნიერია.

მაია წიგნაძე

დღეს ახალი წელია

დელი, დელი, დელია,

დღეს ახალი წელია.

თურმე ჩვენთვის ბებიას

ბევრი საჩუქრები აქვს.

- ეს რა არის, ბებია?

- ტკბილი ჩურჩხელებია.

ეს რაღაა, ბებია?

- ტკბილი ნაზუქებია.

დელი, დელი, დელია,

დღეს ახალი წელია,

ყველაფერი ბევრია.

[თინათინ კვიციანი](#)

ნაძვის ხის სიმღერა

მოვალ, როცა მთა და ბარი

თეთრ ნაბადში გაეხვევა,

პატარების საოცნებო

საახალწლო ნაძვის ხე ვარ.

ჩამოვიყვან თოვლის პაპას,

მხარზე ხურჯინგადაკიდულს,

ჩამოვიტან ნამცხვარს, ქადას,

ჩურჩხელას და შაქარყინულს.

მალხაზებო, მანანებო,

ვარსკვლავების სადარებო,
მოდით ჩემთან, საჩუქრები
დაგირიგოთ, პატარებო!
სიმღერებით ცა მთოვარი
გაათბეთ და გაადარეთ,
ეს ახალი წელიწადიც
ბედნიერად გაატარეთ!

ნოდარ დუმბაძე

საახალწლო

- ახალი წლის საღამოა,
ქარი ქრის და ფიფქი ცვივა,
თოვლის საბანს რომ იხურავ,
ნაძვის ხეო, არა გცივა?
- არა მცივა, პატარებო,
მე ღიმილი თქვენი მათბობს
და გისურვებთ, რომ თქვენს გულშიც
არასდროს არ დაიზამთროს.
ზამთარია, მაგრამ გული
არ გითბებათ ყველას განა?
ხედავთ? თოვლის ბაბუამაც
საჩუქრები მოგიტანათ.
ულრან ტყიდან მოვიჩქარი,
ისე ძლიერ შემეყვარდით,

მე მოვედი, რომ ახალი
მოგილოცოთ წელიწადი.

[ნოდარ დუმბაძე](#)

საახალწლო

რაც ძველია, ძველია,
ძველია და მიდის.
დღეს ახალი წელია,
ზეიმია დიდი.
დაფიფქული წარბებით,
დათრთვილული ქუდით
თოვლისპაპა მოვიდა
თოვლი მოაქვს გუდით.
აბა, ჩქარა, ბავშვებო,
გავანძროთ ხელი,
თორემ დაგვიძველდება
ეს ახალი წელი.

[მორის ფოცხიშვილი](#)

საახალწლო

ჩვენი კოპწია ნაძვის ხე
დღეს ათასფერად ბრჭყვიალებს,
შენ, ჩვენო თოვლის ბაბუავ,
მოსვლას ნუ დაიგვიანებ.
მოდი, გვაცეკვე, გვამღერე,

ისმინე ჩვენი ძახილი,
ჩვენს ბაღში შემოაგელვე
ეჟვებიანი მარხილი.
ახალი წელი მოვიდა,
შენთვის გოზინაყს ვაკეთებთ,
ვიცით, ხურჯინით მოგვიტან
საჩუქრებსა და კანფეტებს.
- სიმღერით გადმომილახავს
გზა შორი, ძნელად სავალი.
ვინა მყავს თქვენზე ძვირფასი,
ცუგრუმელებო სალამი!

[ეთერ სამხარაძე](#)

საახალწლო სიზმარი

ახალი წლის ღამეა
და სასწაულს ველი,
მალე დაჰკრავს თორმეტჯერ -
მიდის წელი ძველი.

ნაძვის ხესთან ვზივარ და
არ ჩამთვლიმოს, ვცდილობ.
თოვლის პაპას რომ დავხვდე,
არ მსურს, დავიძინო.

გარეთ ცივა, სახლში კი

საამურად თბილა...

ჰოდა, შუალამედე

ჩამეძინა ტკბილად.

თოვლის პაპა მესიზმრა

და სიზმარი ახდა -

როცა გამომეღვიძა,

საჩუქრები დამხვდა.

ასე ჩუმად რად მოდის

თოვლის პაპა, ნეტავ?

შუალამეს რად უცდის,

დღე რატომ ვერ ვხედავ?

ნატვრად მაქვს ქცეული

თოვლის პაპის ნახვა...

კიდევ ერთ წელს მის მოსვლას

სად ვუცადო ახლა?...

ვასილ გულეური